



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikadu Imprensa
28 Feveiru 2025

Rejime Tranzitóriu ba Rekrutamentu Majistradu no Defensór Públiku sira La'ós Timoroan sei Kompromete Soberanu Podér Judisiáriu

Aprovasaun Rejime Tranzitóriu ba Rekrutamentu Majistradu no Defensór Públiku la'ós Timoroan iha 24 Feveiru 2025 semana ne'e iha Plenária Parlamentu Nasionál, sei kompromete soberanu Podér Judisiáriu nian tanba iha provizaun sira Artigu 12° A, permite ezersísiu plena ba funsaun jurisdisaun ba majistradu no defensór sira ne'ebé admitidu atu kaer prosesu sira direktamente iha tribunál sira.

Iha artigu 12°-A alinea 1, proposta alterasaun ne'e prevee katak majistradu no defensór públiku sira ne'ebé admitidu liuhosi konkursu públiku ne'e, bainhira iha nesesidade esesionál ruma sira bele ezerse funsaun jurisdisionál atu prezide kazu sira iha tribunál sira iha Timor-Leste."

"JSMP fiar katak laiha duni razaun no nesesidade atu kontrata ka emprega ema estranjeriu atu asume kompeténsia Podér Judisiáriu Timor-Leste nian hodi kaer ka prezide julgamentu ba kazu konkreta sira iha tribunál, tanba ida-ne'e sei ariska no kompromete soberania órgaun judisiáriu ka tribunál nian iha administra justisa hanesan prevee iha provizaun Artigu 67 no Artigu 118 Konstituisaun Repúblika Demokrátika Timor-Leste (K-RDTL) ba ema estranjeriu sira. Saida mak Estadu ne'e presiza mak asisténsia téknika espesializada iha área sira ne'ebé presiza apoiu hanesan asesoria, mentoría no inspesaun", dehan Sra. Ana Paula Marcal, Diretora Ezekutiva JSMP.

Setór justisa no tribunál nu'udar pilár importante Estadu Timor-Leste no nu'udar órgaun soberanu ne'ebé ezerse papél krusiál no xave iha âmbito perspetiva Estadu independente no soberanu. Nu'udar Estadu independente no soberanu, devér boot liu entidade Estadu nian mak proteze interese Estadu nian hosi poténsia intereferénsia externa. Lei ne'ebé permite ema estranjeriu hirak ne'e envolve direktamente iha kazu sira potencialmente atu iha kauza no sei ariska interese Estadu no soberanu podér judisiáriu nian.

Artigu 118 (1) K-RDTL énfaze ho klaru katak Tribunál sira nu'udar órgaun soberanu ne'ebé iha kompeténsia atu administra justisa hodi povu nian naran. Tanba ne'e, funsaun jurisdisionál ba administrasaun justisa nian, konstitui ezersísiu podér ida

ne'ebé soberanu no independente nu'udar konsekuénsia lójiku hosi prinsípiu separasaun podér ne'ebé konsagra iha Konstituisaun. Podér judisiál ne'e nu'udar titulár eskuzivu autoridade judisiál sira nian. Ida ne'e implika kestaun relativamente ho órgaun soberanu ninia nesesidade no rekursu sira tenke mai hosi órgaun referidu la'ós impoin husi órgaun soberanu seluk hanesan órgaun ezeutivo no lejizlativu. Instituisaun judisiáriu sira tuir lei iha órgaun própriu liuhosi Konsellu Superiór Majistradu Judisiál no Ministériu Públiku no mós Defensoria Pública atu avalia nesesidade internu sira.

JSMP hanoin dalaruma Governu konfunde ho espierénsia pasadu iha tinan 2000 ne'ebé establese Painél Espesiál sira ba Krime Grave sira ka tribunál íbridu internasionál no Timor-Leste hosi Administrasaun Tranzitóriu Nasoins Unidas nian iha Timor Lorosa'e (UNTAET) ne'ebé permite juis internasionál ka estranjeiru hodi mai kompoen tribunál hodi julga kazu sira ne'ebé iha ligasaun ba violasaun direitu umanu ne'ebé grave tanba envolve ka konstitui ona autoridade Estadu ne'ebé akontese iha Timor Lorosa'e iha tinan 1999. Modelu tribunál internasionál ida ne'e hanesan dalan alternativu ida alende Tribunál Penál Internasionál (TPI) hodi bele julga krime grave sira ne'ebé akontese no envolve Estadu sira ne'ebé la adere no rekoñese jurisdisaun TPI no mós atu ultrapasa difikuldade atu julga ho TPI. Tribunál Íbridu ne'e hanesan Tribunál Nasionál Internasionalizadu ne'ebé bele loke dalan ba majistradu no defensor ka advogadu internasionál sira mai ezerse knaar juridisionál, tanba nia konstitui dupla jurisdisaun.

Defaktu, setór justisa Timor-Leste hasoru duni limitasaun rekursu umanu, maibé JSMP prefere atu explora modalidade seluk ne'ebé seguru ba interese nasional, konviniente no la rekere despezu boot, liuhosi kooperasaun bilaterál ka multilateral ho membru estadu CPLP sira atu bele fornese apoiu tékniku relevante sira iha inspesaun, mentoria no asesoria.

Estadu Timor-Leste iha ona esperiénsia la di'ak iha tinan 2014 tanba Governu no Parlamentu Nasionál hasai rezolusaun tolu (3) tutuir-malu de'it: Rezolusaun Parlamentáriu Nú.11/2014, Rezolusaun Governu Nú. 29/2014 no 32/2014 hodi demite ofisiál internasionál sira no asesór sira iha setór judisiáriu Timor-Leste tanba interese nasional. Rezolusaun hirak ne'e hamosu kontroversiu oioin liuliu preokupasaun sériu kona-ba interferénsia ba podér independénsia judisiáriu no separasaun podér. Ita lakohi esperiénsia hanesan ne'e akontese fali iha futuru.

Tanba ne'e, JSMP ezije Prezidente Repúblika atu veta artigu ne'e ka husu fiskalizaun ba Supremu Tribunál Justisa atu ezamina ninia konstitusionalidade. Alternativamente através hosi bankada Parlamentár sira atu husu fiskalizaun abstrata Konstitusionalidade ba artigu 120 A bainhira lei tama iha vigór.

Atu hetan informasaun kompletu, favór kontaktu :

Ana Paula Marçal
Diretora Ezeutiva JSMP

Diresaun e-mail: ana@jsmp.tl
Telephone: (+670) 33238883 | 77040735
Website: <https://jsmp.tl>
info@jsmp.tl